



尺牘清裁卷之五十一

吳郡王世貞編

王世懋校

上樊澤

唐符載

故處士孟浩然文質傑美殞落歲久門裔凌遲  
丘隴頽沒永懷若人行路慨然前公欲更築大  
墓闔州縉紳聞風竦動而今外迫軍旅內勞賓  
客牽耗歲時或有未遑誠令好事者乘而有之  
負公夙志矣

尺牘卷之五十一

一

君載書

與子弟

顏真卿

吾去歲中言事得罪以不能違道狗時為千古  
罪人也雖貶居遠方終身不恥汝曹當須諒吾  
之志不可不守也

與人

宋儋

今秋盡野外草木變衰長郊蕭條風物淒緊清  
都久客莫復相親足下退食公庭睡罷私室櫛  
沐晞景收視解聽豈念歲華不待厭倦為旅之  
士哉頃者釀王初令絃絲正調竟欲左攜鄭君

幽指藥妙右對薰叟高談道微情暢世忘浩去  
塵糝足下能順試實其事為何如哉

與楊炎

劉晏

晏賓於東朝猶有官謗相分終始故舊敢不悉  
力以報所知相公匡戴明主為富人侯使僕湔  
洗瑕穢率罄愚懦當憑經義請讜河堤冥勤在  
官不辭水死

荅元稹

韓愈

足下以抗直喜三事斥不得立朝失所不自悔  
喜事益堅微之乎子真安而樂之者

尺牘卷之五

二

與馮宿

楊子雲著太玄人皆咲之子雲曰世不我知無  
害也後世復有楊子雲必好之矣子雲死近千  
載竟未有楊子雲可歎也

荅崔群

僕無以自全活者從一官於此轉窮困甚思自  
放於伊潁之上當亦終得之近者尤哀憊左車  
第二牙無故動搖脫去目視昏花尋常間便不

分人顏色而鬢半白僕家不幸諸父諸兄皆康強早世如僕者又可以圖于長久哉以此忽忽思與足下相見一道其懷小兒女滿前能不顧念足下何由得歸北來僕不樂江南官滿便終老嵩下可相就矣

上李中丞

柳宗元

宗元無異能獨好為文章始用此以進終用此以退今者畏罪悔伏匿惴慄猶未能去之時時舉首長吟哀歌紆泄幽鬱因取筆以書紉韋而

尺牘卷之五

三

編畧成數卷閣下以文章昇大僚統方隅而宗元幸緣罪辜得與編人齒於部內不以此時露其所為以希顧視是自棄也敢飾近草合四十三篇倘以為有可采者當繕錄其餘增几席之汚

與裴埴

比當寒人愈平和惟楚南極海玄冥所不統炎昏多疾氣力益劣昧昧然人事百不記一舍憂慄則怠而睡耳

與蕭俛

讒語轉侈囂囂嗷嗷漸成狂人飾智求仕者更  
晉僕以悅讐人之心千載如新可為長太息

與李建

譬如囚拘園土一遇和景出負墻搔摩伸展肢  
體當此之時亦以為適然顧天窺地不過尋丈  
終不得出復能久為舒暢哉

荅友

自孔氏以來茲道大暢家脩人勵利精竭慮者

幾千矣其間耗廢簡牘役用心神者其可數乎  
登文章之錄波及後代越不過數十人耳其餘  
誰不欲爭裂綺繡互攀日月乎率皆縱誕而不  
克躑躅而不進力蹙思窮吞志而沒故曰得之  
為難

上蕭俛

倘因賊平慶賞之餘得以見白使受天澤餘潤  
雖朽枿敗腐不能生植猶足蒸出芝菌以為瑞  
物

與姚諫議

李德裕

天地窮人物情所棄閣老至仁念舊再降專人  
遠逾溟漲兼賜衣服器物茶藥至多稿木漸榮  
寒灰稍煖自十月末得疾伏枕七旬屬纊者數  
四藥物陳衰又無醫人委命信天幸而自活羸  
敗至甚自料此生無由再望旌榮臨帟涕戀

與孟簡

吳武陵

古稱一世三十年子厚之謫十二年殆半世矣  
霆砰電射天怒也不能終朝安有聖人在上畢

世而怒人臣耶

尺牘卷五十一

五

與田承嗣

薛嵩

昨來半夜有客自魏中來云從元帥牀頭獲一  
金合不敢留駐謹卻封納

荅薛嵩

田承嗣

某之首領係在恩私便宜知過自新不復更貽  
伊戚所置紀綱外宅兒者本防它盜亦非異圖  
今並脫其甲裳放歸田里矣

寄元稹

白居易

僕去年秋始游廬到東西二林間香鑪峯下見  
雲水泉石勝絕因置艸堂前有喬松十數株脩  
竹千竿青蘿為牆垣白石為橋道流水周於舍  
下飛泉落於簷間紅榴白蓮羅生池砌每一獨  
徃動彌旬日平生所好盡在其中不惟忘歸可  
以終老

與元稹

有鄧魴者見僕詩而喜無何魴死有唐衢者見  
僕詩而泣未幾而衢死其餘即足下又十年來  
困躓若此豈六義四始之風天將破壞不可支  
持耶

與令狐綯

柳仲郢

任安不去常自愧於昔人吳誦自裁亦何施於  
今日李太尉受責既久其家已空遂絕蒸嘗誠  
增痛惻

與韋應物

劉太真

顧著作來以足下郡齋燕集相示是何情致暢  
茂適逸如此沈謝何劉如精理意緣情體物備

詩人之旨後之傳者甚失其源惟足下割其橫  
溢師擊之始闕睢之亂於足下見之

與人

杜牧

嗜酒好睡其癖已痼徃徃閉門便經旬日弔慶  
叅請亦多廢闕至于俯仰進趨隨意所在

荅賈秀才

孫樵

物之精華天地所秘惜故蒙金以砂錮玉以璞  
珊瑚之叢必茂重溟夜光之珍以領驪龍文章  
亦然

荅張生

崔氏

玉環一枚是兒嬰年所美寄充君子下體之佩  
玉取其堅潔不移環取其終始不絕兼亂絲一  
絢文竹茶碾子一枚此數物不足見珍意者欲  
君子如玉之貞敬志如環不解淚痕在竹愁緒  
縈絲因物達誠永以為好耳幽憤所鍾千里神  
合春風多厲強飯為佳

上座主

劉軻

軻本沛上畊人代業偶天寶末沓離於邊徙貫



南鄙元和初方結廬於廬山之陽農圃餘隙積  
書窓下日南古人磨礪前心歲月悠久寢成書  
癖

與王駕

司空圖

吾遠已自編一鳴集且擘霆裂月劫作者之肝  
脾亦當吾言之不作也

與李茂貞

王珂

上初反正詔藩鎮無相侵而朱公不顧約以攻  
弊邑弊邑已則邠岐非公所保天子神器歛手  
付人矣宜南華州韓公出精銳固潼關以張兵  
勢僕不武公其惠我西偏之地以為扞守蒲請  
公自有之

與楊行密

田頴

侯王守方以奉天子譬百川不朝於海雖狂奔  
澶漫終為涸土不若順流無窮也東南楊為大  
刀布金玉積如阜頴公上天子常賦頴悉儲峙  
車車以從

署榜下書

夏州民

馬逸及群不時告罪當死敢以良馬一匹贖罪  
并亡馬謹納於路李愿為夏州客訴亡馬者愿為榜購之三日得亡馬及良馬於榜下仍繫以書

荅田告

南唐徐鉉

負鼎叩角顧廬築巖各由其時不失其道在我而已何常之有

與侯君集

高昌王智盛

得罪於天子者先王也天罰所加身已喪背智盛襲位未幾不知所以憊闕冀尚書哀憐

尺牘清裁卷之五十二

吳郡王世貞編

王世懋校

別徽宗

宋明節劉后

一旦遭遇聖恩得與嬪御之列命分寒薄至此  
夭折雖埋骨九泉魂魄不離左右宗廟之重天  
下生靈之衆大王帝姬之多不可以賤妾一人  
過有思念深欲忍死與君父訣別謫限已盡不  
得少留冤痛之情言不能盡

尺牘卷之五十二

一

君載書

荅王觀察

宋張詠

少年無思笑好陪狂徒高談劇飲泊於登朝又  
倅邊郡塞外清帖公中事稀日與虎侯雜戲為  
樂五木未止六博已興投壺奕棋排象旋子斯  
實眇末無足快心其所至者蹴踘引彊擊射笑  
帖攘袂掣肘嗥呼爭羸其或八月草枯縱獵渴  
飲已乏之酒飢飧連血之肉馬不絕馳弓不下  
臂又若天清氣和列坐暢飲樂奏繁劇貌貅引  
前擊劍電轉角觝虎爭餘興未窮則巨觥相罰

倒甕顏冠畧未云止與希生者道真堪喪魄

與慈明師

李道勗

海內法友唯師與楊大年耳大年棄我而先僕  
羊來哀落忍死以一見

與謝希深歐陽永叔

錢惟演

山行良佳少留龍門賞雪無遽歸也

免奉使謝政府

夏竦

比膺指使往奉歡盟選授至艱道塗差近况多  
侑幣寔濟空拳然念願歲先人沒於行陣春初

尺牘卷之五

二

母氏始棄孤遺義不戴天難下單于之拜哀深  
陟屺忍聞禁侏之音車府露章槐庭泣血王姬  
築館接仇之禮旣嫌曾子回車勝母之游遂輟  
荷兩宮之大庇戴三事之昌言退安四壁之貧  
如獲萬金之賜

與韓稚圭

范仲淹

素問奇書其精妙處三五篇恐非醫者所能言  
也書序云三墳言大道也此必三墳之書宜少  
服藥專於積氣養生之說也道書曰積氣成真

是也唯節慎補氣咽津之術可行之餘皆迂怪  
貪慕神仙心未灰而意已亂必無信矣兒子致  
疾由此也近却肯服藥有差望耳亦未醒

與晏尚書

衢歛二水合於城隅一濁一清如濟如河百里  
而東遂為浙江漁釣相望鳧鷖交下有巖子陵  
方干之隱茅群峯四來翠盈軒窓東北曰烏龍  
崔嵬如岱西南曰馬目秀狀如嵩白雲徘徊終  
日不去巖泉一支潺湲齋中春之晝秋之夕既  
清且幽大得隱者之樂惟恐逢恩一日移去

尺牘卷之五十一

三

與劉原父

歐陽脩

得介甫新詩數十篇皆竒絕喜此道不寂寞以  
相告

與程文簡公

柳湖陳之甘棠思有所頌述以遺陳人為他日  
故事以彰公之雅志不唯拙訥直以多事匆匆  
殊所不暇秋涼必償素願得次詩榜之末亦大  
幸矣

與蘇子容

拙詩趣韻有梅二之業病無其工也行香後乘  
涼枉駕作一盃飯奉待却有絕品茶數種可試  
與仲儀

新歲晴和不審尊體何似湖園清曠春物嚮榮  
然尚在遏音必未欲會聚其如間適之趣幽靜  
尤佳每苦紛勞但深傾羨也老年相知無幾尺  
書相問略亦無嫌餘暇何惜數字少慰病翁然  
以自久無書不敢奉恠也

尺牘卷之三

四

答蘇子瞻

王安石

知尚盤桓江北俯仰踰月豈勝感悵得秦君詩  
手不能捨葉致遠遠見亦以為清新婉麗與鮑  
謝伯仲不知公意如何餘卷正冒眩尚妨細讀  
嘗鼎一臠旨可知也公竒秦君數口之不置吾  
又獲詩手之不捨然此君嘗學至言妙道無乃  
咲我與公嗜好過乎

答蔡天啓

近附書想達比日安否如何何時南來日以企

佇得書說同生基以色立是也所謂猶如野馬  
熠熠清擾者日光入隙所見是也衆生以識精  
水合此而成身衆生為想所陰不依日光則不  
能見想陰既盡心光發宣則不假日光了了見  
此此卽所謂見同生基也

與吳特起

今歲暑雨特甚多逃於北山年光氣衰復值此  
非常氣候殊為憊頓書不及悉

與沈道原

辱手筆感慰又復冬至投老觸緒多感但日有  
卜歸之思耳上聰明日隳然流俗險膚未有已  
時亦安能久自困苦於此北山松栢間脩雅說  
已極茂長一兩日令俞遜往因欲漸治垣屋矣

與王宣徽拱辰

伏承屢求自佚聖主貪賢想必未遂高隱無緣  
造詣豈勝企仰安石衰疾日積待盡立園每荷  
眷記但深感切

與王安國

馮京

并門歌舞妙麗閉目不窺日以談禪為事

答馮京

王安國

若如所論未達禪理閉目不窺便是一重公案

荅韓維

蘇舜欽

此雖與兄弟相遠而伏臘稍足居室稍寬耳目  
清曠不設機關三商而眠高春而起淨院明窗  
之下羅列圖史蒲博琴尊以自愉悅有興則泛  
小舟出盤閭二門吟嘯覽古於江山之間渚茶  
野釀足以消憂蓴鱸稻蟹足以適口又多高僧  
隱君子佛廟勝絕家有園林珍花奇石曲沼高  
臺魚鳥流連不覺日暮

上樞密

司馬光

貝州軍士恩過而驕厭其父生自求速死雖狂  
戇妄為勢無所至早晚之間終就屠滅書曰除  
惡務本周頌曰鋪時繹思我祖維求定明聖主  
之誅不在快志多殺要欲布陳條理期於安定  
而已

與范堯夫



久絕榮進之心委順田里凡朝廷事未嘗挂慮  
數年以來昏怠特甚誠不意一旦冒居此地故  
事多所遺忘朝中士大夫百入中所識不過三  
四如一黃葉在烈風中幾何其不危墜也又為  
世俗妄被以虛名不知其人實無所有上下責  
望不輕如何應副望濳教督以所不及隨時示  
諭勿復形跡此不敢望於它人者也

簡呂公著

比來物論譏誨叔慎默太過若此際不廷爭國

尺牘卷之五

七

事蹉跌則入彼朋矣光自病以來以身付醫家  
事付康國事未有所付今日屬於誨叔矣

寄人

范純仁

此中羊麩無異北方每日閉門煖餈既不知身  
之在遠

按此自政府謫  
永州時書也

與王尚

曾鞏

比得呂南公愛其文南公數稱吾子至南豐又  
得黃曦復愛其文而吾子復以文見貺私心喜  
慰何可勝言惟強於自立使可愛者非特文詞

而已此鄙劣所望於三君也

答秦太虛

蘇軾

所居對岸武昌山水佳絕有蜀人王生在邑中  
徃往為風濤所隔不能即歸則王生能為殺雞  
炊黍至數日不厭又有潘生者作酒店樊口棹  
小舟徑至店下村酒亦自醇醞柑橘柺梯極多  
大芋長尺餘不減蜀中米斗二十釐鹿如土魚  
蟹不論錢旗亭監酒胡定之載書萬卷隨行喜  
借人看曹官數人皆家善庖饌喜作會吾事不  
既濟矣乎展讀至此想見掀髯一咲也

尺牘卷之五

八

與李端叔

上問無它祝惟保愛之外酌酒與婦飲尚勝偶  
俗侶對梅二丈詩云耳

與李方叔

暑中既不飲酒無緣作字時有一二輒為人取  
去無以塞好事之意亦不願足下如此僻好也

答李方叔

軾以虛名過實士大夫不察責望踰涯朽鈍不

能副其求復致紛紛欲暫駐省靜寡過之地以  
餞餘年不知果此願不故人見愛以德不應更  
虛華粉飾以重其不幸承示諭但有愧汗耳

與陳季常

軼職事雖清簡而京輦之下豈有閒人不覺劫  
劫過日勞而無補顏髮蒼然見必笑也

答陳季常

季常安心家居勿輕出入老劣不煩過慮決須  
幅巾草履相從林下也亦莫遣人來彼此鬚髯  
如戟莫作兒女態也

尺牘卷之五十一

九

與姜唐佐

今日霽色猶可喜食已當取天慶觀乳泉潑建  
茶之精者念非君莫與共之然早來市中無肉  
相與啖菜飯耳不嫌可只今相過

尺牘清裁卷之五十三

吳郡王世貞編

王世懋校

與王慶源

蘇軾

近稍能飲酒終日可飲十五銀盞它日粗可奉陪於瑞草橋上放歌倒載也

又

遠沐寄示老手高風欽詠不已知宅醞奇甚日與蔡子華楊君素聚會每念此則致仕之興愈

濃也

又

人生悲樂過眼如夢幻不足追惟以時自娛為上策也軾名位過分日負憂責惟得幅巾還鄉平生之願足矣幸公千萬保愛得為江邊籍草之游樂如之何

與潘彥明

僕暫出苟祿耳終不久客塵間東坡不可令荒第終當作主弟諸君游如昔日也願徧致此意

荅劉貢父

軾忝冒過甚出於素獎然迂拙多忤而處爭地不敢作久安計兄當有以教督之茯苓松脂雖乏近效而歲計有餘也默坐反照閉目數息當記別時語耶

與王定國

數日卧病在告不審起居佳不知今日會西壻清虛陰森正好劇飲坐無狂客冰玉相對得無少澹否扶病暫起見與子由簡大罵書尺徃還正是攪人可憎之物公廼以此為喜怒乎仙人王遠云得此書當復劇口大罵之固應爾然而不可以徒罵也知公澹甚徃發一笑

與知縣

晉卿相見殿門外惘然如夢中人也人世何者非夢耶亦不足談但喜其容貌蔚然如故非有過人能如是耶

與蒲廷淵

河中永洛出東道家所賢事見真誥唐有道士

侯道華嘗得無核者三食之後竟竊鄧大主藥  
上昇君到彼試求之但恐得之不偶然耳

答士言

雪霽清境發於夢想此間但有荒山大江脩竹  
古木每飲村酒醉後曳杖放脚不知遠近亦曠  
然天真與武林舊游未易議優劣也

與李公擇

僕行年五十始知作活大要是慳耳而文以美  
名謂之儉素然吾儕為之則不類俗人真可謂  
淡而有味者自謂長策不敢獨用故獻之左右  
往京師尤宜用此策也一咲

與蔡景敏

臨臯南畔竟添屋三間虛敞便夏蒙賜不淺胸  
山臨海石室信如所諭前軾嘗攜家一游時家  
有胡琴婢斂室中作護索涼州凜然有冰車鐵  
馬之聲婢出久矣因公復起一念果若游此當  
有新篇果爾者亦當破戒奉和也

又

承愛女遽棄左右痛割難堪柰何柰何區區願  
公深照一付維摩莊周處置為佳也

荅趙景

藤旣美風土又少許訟優游卒歲又復何求軼  
亦甚樂此安土忘懷如一黃人元不出仕而已  
荅趙仲脩  
公清貧更煩輟惠羊邊謹已拜賜使我有數日  
之飽公亦無乃浹旬蔬食耶一嘆

與毛維瞻

尺牘卷之三

四

歲云暮矣風雨淒然帘窓竹屋燈火青熒時於  
此間得少佳趣無由持獻獨享之愧想當一嘆  
也

與孟亨之

今日齋素食麥飯笋脯有餘味意謂不減芻豢  
念非吾亨之莫識此味故餉一合并建茶兩片  
食已可與道媪對啜也

與楊元素

城南有亞父塚然非也塚在居巢城北有劉子

政墓昔欲為起一祠以水大不果公若有餘力  
成之亦佳城西有楚元王墓曾出獵其下石佛  
山亦佳觀

與耘老

久放江湖不見偉人昨在金山滕元發以扁舟  
破巨浪來相見出船巍然使人神聳好一箇沒  
興底張鎬相公見時且為致意別後酒狂甚長  
進也

又

今日無別事舟中十指如懸槌適有人致嘉酒  
遂獨飲一杯醺然徑醉念賈處士貧甚無以慰  
其意乃為作怪石古木一紙每遇饑時輒以開  
看還能飽人不若吳興有好事者能為君月致  
米三石酒三斛終君之世者便以贈之不爾可  
令雙荷葉收掌須添丁長以付之也

荅徐仲車

昨日旣蒙言贈今日又蒙心送益然有得載之  
而南矣



答李端叔

得罪以來深自閉塞扁舟草屨放浪山水間與  
漁樵雜處徃徃為醉人所推罵輒自喜漸不為  
人所識平生親友無一字見及有書與之亦不  
答自幸庶幾免矣足下又復創相推與甚非所  
望木有癭石有暈犀有通以取妍於人皆物之  
病也

與程全父

軾與兒子粗無病但黎蠶雜居無復人理資養

尺牘卷之五三

六

所急求輒無有初至僦官屋數椽近復遭迫逐  
不免買地結茅僅免露處而囊為一空困厄之  
中何所不有置之不足道聊為一笑而已平生  
交舊豈復夢見懷想清游時誦佳句以解牢落  
答程全父

隨行有陶淵明集陶寫伊鬱正賴此耳山川風  
氣能清佳否孰與惠州比此間海氣蒸溽不可  
言引領素秋以日為歲也

與惠州都監

君南來清節幹譽為有識者所稱皆曰此東坡  
弟子由門下客也兩漢游徼卒史至公卿者多  
矣願幸廣問學以期遠到

與楊元素

近聞小人輒瀆左右此何品類也乃敢如此信  
知困中無種不有想以道眼觀之何啻蚊蟲一  
笑可也

與千之姪

獨立不懼者惟司馬君實與叔兄弟耳萬事委  
命直道而行縱以此竄逐所獲多矣因風寄嚴  
此外勤學自愛去歲作試官問史傳中事無一  
兩人詳者可讀史為益不小也

荅增城令

示諭幼累已到城流寓中一喜然老稚紛紛口  
眾食貧向之孤寂未必不佳也

與循守周文之

承許遠訪何幸如之海州窮獨見人即喜况君  
佳士乎

與楊濟父

軾與幼子過南來餘皆留惠州生事狼狽勞苦  
萬狀然曾中亦自有悠然處也

與劉宜翁

昔葛稚川以丹砂故求句嶠令先生儻有意乎  
嶠南山水竒絕多異人神藥先生不畏嵐瘴可  
復一游則小人當奉杖屨以從矣

與蘇伯固

到虔州日往諸刹游覽始見中原氣象泰然不  
肉而肥矣何時得與公久聚盡發所蘊相分付  
耶

尺牘清裁卷之五十四

吳郡王世貞編

王世懋校

荅王敏仲

蘇軾

軾垂老投荒無復生還之望昨與長子邁訣已處置後事矣今到海南首當作棺次便作墓仍留手跡與諸子死即葬海外庶幾延陵季子羸博之義生不挈棺死不扶柩此東坡家風也此外宴坐內照而已

荅毛澤民

尺牘卷之五十四

一

君載書

寄示竒茗極精而豐南來未始得也亦時有山僧逸民可與同賞此外但緘而藏之耳佩荷厚意永以為好

荅錢濟明

嶺南家家造酒近得一桂酒法釀成不減王晉卿家碧香亦謫居一喜事也有一頌親作小字錄呈切勿示人

與元老姪孫

海南連歲不熟泉廣海船絕不至藥物醬酢等  
皆無厄窮委命而已老人與過子相對如兩苦  
行僧耳然胷中亦超然自得不改其度

### 荅孔毅父

承諭子由不甚覺老公蔚茂如昔不肖雖皤然  
亦無苦恙劉器之乃是鐵人但逝者數子百身  
莫贖柰何柰何江上微雨飲酒薄醉書不能謹  
荅叅寥

淨慧琳老及諸僧知因見致懇知為默禱於佛

尺牘卷之五

二

欲亟還中州甚荷至意自揣省事以來亦粗為  
知道者但道心數起數為世累所擗奪恐是諸  
佛知其難化故以萬里之行相調伏耳

### 與寇君

軾日疲歸蜀耳終當過岐雍間徜徉少留以償  
宿昔之意君自名臣子才美漸著豈復久浮沉  
里中互及今為樂異時一為世故所縻求此閒  
適豈復可得耶

### 與鄉人

軾去鄉十八年老人半去後生皆不識面墳墓  
手種木已徑尺矣此心豈一日忘歸哉久放山  
澤乍入朝市張皇失次觸目非好也但久與子  
由別乍得一處所以為喜幸然此即君迺作諫  
官豈敢望久留者相知之深故詳及一二

荅胡道師

再過廬阜俯仰十九年陵谷草木皆失故態栖  
賢開先之勝殆忘其半幻景虛妄理固當耳獨  
山中道友契好如昔道在世外良非虛語道師  
又不遠數百里負笈相從秉燭夜闌恍若夢寐  
秋聲宿雲了然在吾目中矣

與趙德麟

數日不接思渴之至衝冒風雪起居何如端居  
者知愧矣佛陀波利之虐一至此耶乃知退之  
排斥不為無理也酒二壺迎勞惟加鞭

與程天侔

白鶴峯新居成當從天侔求四色果木太大則  
難活太小則老人不能待當酌中者

與毛澤民

新居在大江上風雲百變足娛老人也

與鞠持正

兩日薄有秋氣想起居佳勝蜀人蒲永昇臨孫知微水圖四面頗為雄爽杜子美所謂白波吹粉壁者願挂公齋中其可以一洗煩暑也近晚上謁次

答范蜀公

請公試觀能惑之性何自而生欲救之心作何形相此猶不力彼復何依正恐黃面瞿曇亦須歛衽况學之者耶

與大別才老

山門虛寂長夏安隱燕坐湛然得無所得無緣面話萬萬自愛

與徑山長老

嶺南萬里不能死而歸宿田野遂有不起之憂豈非命也夫然死生亦細故耳無足道者唯為佛為法為衆生自重

荅陳師仲

蘇轍

轍少好為詩與家兄子瞻所為多少相若也子瞻既已得罪轍亦不復作詩然今世士大夫自亦不喜為詩以詩名世者蓋無幾人間有作者尤足賢也故僕得其所為輒諷詠終日譬如新病瘡人口不復歌聞有歌者猶能手足舞蹈以自慰釋足下尚能以五百篇見惠耶苟有以慰我不必矜自口出也

與人

米芾

尺牘卷五十四

五

吾友何不易草體想便到古人也蓋其體已古但少為蔡君謨脚手耳又無索靖真跡看其下筆處月儀不能佳恐它人為之只唐人耳無晉人古氣草書若不入晉格徒成下品張顛俗子變亂古法驚諸凡夫自有識者懷素少加平淡稍到天成而時代壓之不能高古高閑而下但可懸之酒肆詈光尤可增惡也

又

海岱咫尺不能到焚香而已日短不能畫眠又



少人往還惘惘足下比時何所樂

簡邵彥瞻

秦觀

春色遂爾藹然草木魚鳥各有佳意廣陵多登臨之美臨風把盞所得故應不貲

與王觀復

黃庭堅

今年戎州荔子歲登一種柘枝頭出於遏臘中大如雞卵味極美每斤才八錢此行似不虛恨公不同此味又念公無罪

荅王子飛

尺牘卷之五

六

陳履常正字天下士也公有意於學者不可不往斯人之門古人云讀書十年不如一詣習主簿端有此理

與李端叔

老夫懶作文但傳得東坡及少游嶺外文時一微吟清風颯然顧同味者難得耳

又

數日來驟煖瑞香水仙紅梅盛開明窓淨室花氣撩人似少年時都下夢也但多病之餘懶作

詩耳公比來亦遊戲翰墨間耶比得荊州一詩  
人高荷極有筆力使之陵厲中州恐不減晁張  
但公不識耳

與劉溫如

昨日過峽州適值斷臂道者相候不得却歸山  
中恨不更與斷却一臂也

與輔聖

庭堅碌碌中秘書幸得窺金匱石室而歲來老  
嬾無復日新又衆口食貧思得一江湖差遣使

老幼溫飽耳

與王瀘州

棄捐漂沒早衰多病杜門不與人事之日久矣  
不能承動靜缺然累月引領旌旆何日不勤庭  
堅已成老農畦種摩圍之下粗給衣食無緣瞻  
望臨書增情

與東川提舉

某名在不赦之籍長為人間棄物胥疏隱約蓬  
蒿之下直偷生耳已無冠蓋可從人間禮數幅

巾短褐僅自蓋纏不可以叅謁使車道左竊惟  
盛德之度可以存而不論言語鄭重老病之常  
態冒瀆情重悚仄無地

與李德叟

蒼顏白髮已成老翁但以老者係戀兒女不欲  
向江湖直強顏班列中耳局中文字煎迫舊書  
亦荒廢日憤憤了無可樂者甚思阿髯誦詩蝟  
毛森張慰此寥落也

與元不伐

所諭家徒四壁應舉蹉跎貧者士之常富貴在  
天安可人力較耶知寸心不與萬物俱盡則在  
此不在彼矣千萬開拓胷次衡門之下古人不  
遠

又

知命挾雌將雛下荆峽迎元明未得近音也文  
章殊不能下筆蓋才智與齒髮俱衰憂病又侵  
其半所謂吾猶昔人也有放浪石刻數種亦可  
以見其衰颯散誕矣

與榮州薛使君

賢州士人維周彥衣冠之領袖也其人溪中篤厚雖中州不易得也紫衣僧祖元亦彥族兄抱琴種竹有瀟灑之趣以星曆推休咎常得十六七八試問之可知也

與黃魯直

陳師道

邇來起居何如不至乏絕不何以自存有相恤者不令子能恚意不風土不甚惡不平居有可吊語者不仕者不相陵不何以遣日亦著書不近有人傳謁金門詞讀之爽然便如侍語未知此生亦復能相從如前日不

與陳仲清

陳瓘

向仲清間異省已畢歲向仰引領未嘗一日不在懷也老矣倦於遊騁俯仰自悼能不慨然大觀者不趣外遊係形者不能捨相情隨事遷豈有終極人當自信所悟何在契迹古人暮年每事興闢是非長短齊於一致仲清昔也氣盛或以慨激為事吾所不取今亦老矣當盡舍故懷

隨其所遇以時自樂觀流咏竹足以永日不言  
之化契合無生又何在記於言述然後為得也  
此懷萬萬非言可既在痛察而已若未以為然  
當以見謝無外

答陳永年

陳若水

領諭良極欣感幽室靜坐終歲無兩語者同遊  
於娛樂之地有何人哉今覽盛述殊暢所懷若  
虛室之集清風也人情悲樂猶湍水之流無有  
終畢人之所同然者有一大事不在世情之外

尺牘卷之五十四

十

自古自今非長非短得此者未嘗得至此者無  
所至豈死生悲樂之所能遷蹠靜視聽之所可  
係歟今觀老兄所諭因得之矣向之云云及吾  
昔者之言已陳之迹今何在哉自是吾無言矣  
何由會見以既此懷臨風引仰但有惓惓  
集蘭亭字而成  
者詞理亦可取  
按二書乃

尺牘清裁卷之五十五

吳郡王世貞編

王世懋校

與張右丞

宋孫覲

臨川山水佳絕別墅又領甚高要情思超然獨  
擅一壑每讀九章想見其處而以不得從杖履  
一快洞心駭目之觀以為恨也索詩輒牽課上  
呈幸一讀置之

與胡樞密

尺牘卷之五十五

君載書

新第落成市穀不入耳俗執不至門客至命坐  
青山當戶流水在左輒談世事便當以大白浮  
之使不得言也如覲當晨夕奉杖履心復掃迹  
瞻悵不可以言

與何樞密

向公持一節使萬里外忠信之效久而見思故  
今復有此命辱此隆冬乘單車犯初寒絕大漠  
折衝口舌之間必有神物護持之助覲雖老矣  
猶及見功名之盛

與李尚書

省書喜聞眠宿大佳覲已遂首止而公亦安於  
閑寂相望耿耿如太白之配殘月也

又

雅醞籍尊賢賢老自有家風寓公諒無泥中之  
嘆相之猶未造官殆是閩盜未靖之故福唐太  
尚置家其中度無可慮者舉之詩語益奇迺翁  
一部鼓吹也

與常州徐守

尺牘卷之五十五

二

衰老不堪兒女之債比客去已恍如醉夢中矣  
雪餘台候萬福勝否比客過都迎餞良苦第當  
脂轄送將無庸祝之便生四角也一咲

與無為趙守

鍾陵舊國故都江山雄竒天下絕境部使者風  
采震疊百城而有方外之樂一行作吏豈復有  
一適如公者乎

與人

米友仁

蒙勤勤之喻深悉謹卣之隆然友仁今投閒杜

門未嘗輒敢以書干諸中外在位者縱干之豈  
有響應之理蓋世法中物態從古如此惟萬萬  
深亮

與叔興

韓駒

浮江二千里眼厭旌旗不料到此復見擾擾也  
然駒間關自賊中來最能言其情狀若無內應  
決不能入故須靜以俟之擾則民怨驚則民駭  
二者足以召變不可不知也

與人

虞允文

尺牘卷五

三

河朔鷺梨五十枚南詔餘柑子一桶納上方尊  
俎報答春光之勝亦或一助

答趙撫幹

王十朋

蝻蟬風味不惟勝無腸公子自可輩江君瑤枉  
臨食必起故鄉之思但不能如張翰勇決耳遠  
蒙分貺以養吾老饕愧感俱不少也道山石渠  
輒納墨本致之悠然閣可與南山俱入眼劉子  
政乃天祿閣中人豈容懷惓惓之忠久屈於外  
耶



答鞏仲至

朱熹

放翁詩錄寄幸甚此亦得其近書筆力愈精健  
頃嘗憂其跡太近能太高或為有力者所牽挽  
不得全其晚節計今決可免矣

又

熹衰病沈痼日甚一日告老之章且幸得請將  
謂世已相忘然猶未脫誰何之域尸居餘氣何  
足加念彼亦正自過慮也

上吳大尹

楊天惠

八續卷之五

四

自開府以來西南文藝之俊聯薦墨附賓籍者  
焯焯有聞矣高者殆將與之同升金玉王度下  
者猶使之有立鼓吹雋林而某以貧窶之故受  
廛岷山之陽食指猥衆待耕耨而後飽誠不可  
一日舍穡事以游重以不幸負幽憂之疾有癖  
違之累慙恐遁匿不復自齒於人倫尚敢驤首  
印臆希咳唾餘澤於一二英賢後耶今穡事有  
間舊疾小愈妄自念言前日聯薦墨附賓籍者  
非同社之良則皆旁邑之望也故願上名謁仰

門下之多獲俛賀吾人之有遭閣下引之斥之前之卻之唯命是須弗敢去也

寄蔣左史

魏了翁

經由錫麓室邇人遠回首十年前良賢領袞群  
彥泛雪敲冰裝回累日而後去今何可復得迺  
知樞庭督而於我何加所謂武夫從者祇赫童  
鴉耳

回李宮教

文天祥

令弟來聞病日少寬為之喜幸日欲專价詳問

尺牘卷之五五

五

塵坳因循心甚愧之昔人云身在則有餘舉天  
下不如意事屏置度外專精神事醫藥靡不有  
濟用敢於岐黃忠愛之外輒奉清心一方為獻

與朱太博

聞車騎在郊外政欲嗣訊韓星忽來偉然朶雲  
之贈故入渠渠勞苦行役諸兒那識此意曉起  
入山新流沒岸棋聲未盡石骨依然人生徃徃  
如此可超然一笑承有訪沙之約上已前後擬  
山行數日須主人在竹所可乘興分沙一席已

戒白鷗退避矣呼燈走筆馳意沈寥

答鍾叔玉

杜門避影久矣出山一事不到夢寐間聞命誤  
節湘羅笑人方循墻丐祠以安半菽倘拜俞音  
春晝花陰猿鶴飽卧亦五雲之餘蔭也

與梅制幹

風雅比興韶鈞交作長軸大冊一再寄意而不  
倦鬼神閱吾山數千百年今而後衣被雲錦草  
木澤澤光價益信章之謹頓首謝子秀別三年  
漸成六考近書謂赴吏部銓將取一闕人豪如  
此猶落骰子選非朋友之責哉

答謝教授

寒簷積雨抖擻無惊得書而讀之昏眼為拭天  
祥落落白雲間一疇春綠自飯吾犢浮世榮辱  
事付之山外褒惜所蒙君言過矣

與繆知府

天祥茅屋三間在萬山深處借書沽酒外一毫  
不以為公私撓獨蒔松百畝日騎牛扣角其間

天惠仁侯自此吏不打門犬不吠吠猿嘯虎嘯  
各適其適則某受賜多矣

與趙監丞洪

天祥漁隈半席自分小休誤渥自天俾尋庾謝  
舊盟意此是杖拭蒼蒼之陋耳三辟弗可乃以  
陽月之望東書出天台涉重湖越大江以是月  
丙寅抵賤事凋城敗屋枵然大瓠耳搔首踟躕  
望洋氣縮

與李安撫芾

尺牘卷之五十五

七

辱知愛門墻非一日之故風流雲散每一念此  
神爽飛馳明公當世人物卷韜山林四方顯顯  
望其一出方時多艱嫠緯忘食然見王茂弘者  
固以為江左有管夷吾某有計日以俟鋒車耳  
區區走趨實在中台之里如聞杜門謝客雅意  
絕塵然猿鶴必不我拒相望在近凝泝神馳

答唐書記

天祥花朝前四日抵雲舍又十日奉重闈泝灘  
而上襍前一日抵空同郡事稍簡俯仰半菽皆

商燾賜也江湖寥落鴻影參差安得素心人相  
甫數晨夕每誦此詩明發不寐輒承咫尺小澣  
我私采采澗芹臨風如結

答曾連推

單車馳岫嶼下十閱月大行白雲繚繞清夢陳  
情一再天高聽下界以便符奉重符抵空同三  
見冀茨矣聞車馬行色且旦夕出領某倘未以  
罪去得握手道舊豈不快哉占謝蘊如馳邇一  
碧

尺牘卷五十五

八

與趙子昂評書

元鮮于樞

張長史懷素高閑皆名善艸書長史顛逸時出  
法度之外懷素守法特多古意高閑用筆粗十  
得六七耳至山谷乃大壞不可復理

與鮮于伯幾

趙孟頫

常州張治中有虞永興枕卧帖筆意清峭紹興  
內尚故物足為希代之寶吾兄伯幾不可不知  
也自公枕卧來七八日未云世南呈凡十餘行  
頃都下四次借閱因不肖嗟賞遂爾寶秘不爾

亦不甚愛可惜可惜有建業文房之印紹興小  
璽平生僅此一種虞書耳

又

都下近見有晉人謝稚三牛圖妙入神非牛非  
麟古不可言

與張伯雨

獲領世外之言使人忘人間之累

又

所惠周鐘其日立秋而鐘迺夷則亦可喜之事

尺牘卷之五

九

與朱萬初

虞集

深山高居爐香不可缺退休之以佳品之絕人  
為取老松栢之根枝實葉共擣治之所風昉羸  
和之每焚一丸亦足助清苦今年大雨時行土  
潤溽暑特甚萬初致石鼎清晝香空齋蕭寒遂  
為一日之借良可喜也

與昭文相

集之西游獲衣被光華以遂登臨之樂又以其  
間得申其情事於百歲荒殘之丑壠大槩昭文

之賜也還京之日即圖謁謝而襜帷容容已在  
鈎陳豹尾間矣

與張伯雨

承舍福真便向江東西名山縱游此最上奇事  
惟在勇為仙真人即未便居天上要亦不肯  
來塵中汨汨山水勝處多所恒游願吾伯雨早  
有玄遇某俗緣未了此事但輸一籌先耳

與張伯雨

馮子振即待制  
海粟也

尺素自華陽來病良覲不異度月後必作句曲

尺牘卷之五

十

之游胥晤決矣側聞公山居即梁昭明讀書處  
不知雨苔露蘚物色尚有婆娑滂漉片段否山  
中著述至時琳琅珠玉一日畢見大蘇云不意  
暮年見此奇特當共一賞嘆惜某非其人也

又

貞居一賦筆力高絕直可追聲千載是王子年  
段成式向上人物

與張伯雨

吳軫字楚卿

憶三峰雪霽斗柄插卯倉皇分袂於洞泉石磴

間尔後萍寄錢唐春又仲矣仰惟宴坐南巖尚  
友千古采芝服木種竹栽桃山靈相其出入洞  
籙進其班資去冬薄聞羽車暫出京口意或可  
陪眉叟真人一還武林乃竟高蹈入林徒令悵  
惺茲鶴使良便冒致空函倘有風郵以俟嘉信

與介石

倪瓚

瓚奉別後從蘭陵東部門外人家少憇三日待  
荆溪發行李來即歸田舍到家稍稍休歇而州  
縣科差迫促騷然因歎那能復以憤懣從彼之

及牘卷之五

十一

榛榛乎便命扁舟入吳寓村落中調氣靜坐得  
以少抒其中磊磊者一日從一二林下人登靈  
岩山覽觀天池石壁之勝尋姑胥臺古跡若司  
馬子長蘇長公悲世憤俗有不勝其哀後百世  
而不及見古人則求古跡觀以自解惜不肖非  
其人回望太湖之西諸山依約拈點數螺若芥  
舟泛泛杯中者當是銅官離墨因並吾寄止  
公政著白雲滅沒處杜門著書降屈其心志不  
能以道表見於當世真為之泣下沾襟也



吉德帖

吉德所臨風俗為厚望進此道寵辱俱忘履候  
多福僕學所積而我室人亦成長往哀摧哽塞  
大不可言日月不居奄踰兩月依依故物觸事  
損心柰何柰何以世緣言之悲歎何能有已若  
以法眼觀之則我此身誠亦無有此宗少文所  
以三復至教方能遣哀耳襄事粗畢大山長林  
之思此心已羣於鹿豕間矣

答梁王

大理段寶

尺牘卷之五

十一

殺虎子而喂虎母分狙栗而詐狙公金印玉書  
釣魚香餌繡閨淑女掩雉網羅平章既亡兄弟  
罄絕今止遺一嫠一奴再贅華黎氏嫠又配阿  
槁妃如此我必借兵如其不可待金馬作點蒼  
昆明作西洱時來矣

阿槁梁王女也王忌段功  
強以女配誘而害之後功

子寶長王有外寇  
借兵答書云云

尺牘清裁五十五卷

